

## El GPS...

*Sketch tiré du spectacle : « Les belles vacances de D'siré et Marylou »*

*(D'siré raconte un épisode de ses vacances)*

*D'siré, pensif : — Ah les vacances ! Les vacances ! Les vacances ! Que cha fait du bien les vacances ! Incore faut-i pas les rater, ses vacances...*

*Au public : — Dites-me... vos dernières vacances... cha a été ? (Il tend le micro)*

*Le public, frileux : — ouiii...*

*D'siré dépité, les épaules basses : — Pfff... Vous pouvez faire miux qu'cha quaind même !*

*Il repose la question : — Vos dernières vacances, cha a été ? (Il tend le micro avec un grand mouvement de bras)*

*Le public : — OUIIIIIIIII !*

*D'siré : Mi non pus... Figurez-vous que l'velle ed partir min voisin i m'a prêté sin GPS... mi j'n'ai pas d'GPS... I m'a donné toute chelle boîte, j'vos incoré chelle marque edzeur : ch'étot un Tam-Tam ! Eddins y'avot ch'GPS... éch' l'étui pou l'ringer quand i n'sert pas... el support qu'in atique su ch'pare-brise après avoir mis de l'crache su chelle ventousse : beeerck ! Et pis y'avot aussi deux chargeurs : un qu'in branche dins ch'l'auto in roulant... et un aute qu'in peut brancher à s'mason. Eh ben justemint, in rintrant à m'mason j'ai vu que l'batterie all' étot à plat : ch'voyant i-étot rousse... J'ai branché ch'GPS su el secteur et eun' mi-heure après ch'voyant i-étot vert : im-pec-cappe ! Mais quand j'l'ai pris dins m'main pou l'débrancher... y'a eun' voix qu'i-est sortie de ch'GPS : « Faites le tour du rond-point, deuxième sortie ! » Dins m'mason !! J'ai pas voulu l'contrarier... j'ai fait l'tour de l'tape de l'salle à minger... et j'sus parti dins ch'couloir... Au même momint Marylou all' rintrot des commissions et comme in allot s'crojer dins ch'couloir in a intindu tous les deux : « Garder la droite... Garder la droite... » In s'a ravisés comme deux becs-bos... in s'a serrés conte éch mur pou s'crojer et mi j'ém' sus artreuvé min nez conte el porte d'intrée... Éch GPS : « Faites demi-tour dès que possible ! » J'ai arparti dins l'aute sins... j'ai arcroché Marylou qu'i-arsortot au même momint et là in a incoré intindu tous les deux : « Gardez la gauche... Garder la gauche... »*

*Au public : — Dites... cha fait de l'politique éch' machin là ? Pace-que l'fos d'avant in avot pon gardé la droite... l'fos d'après in a pon gardé la gauche non pus... In s'deminde bien qui qu'ch'est qu'in a gardé ch'caup chi ! Après cha, comme j'avos chuché un d'mi avec min voisin j'avos invie d'picher... J'avos m'main su l'porte de ch'cabinet et vlà que ch'GPS i m'annonce : « Péage ! » Et su ch'l'écran y'a un message qui s'affiche : « Votre itinéraire comporte des zones à péages, voulez-vous les éviter ? » A t'mote que j'veux les éviter : j'vas quaind même pon paier pour aller picher à m'mason ! Deux minutes après, à pein.ne sorti de*

ch'commun vlà un trianque gane intouré d'rouche qui clin.ne su ch'l'écran : 'Danger' ! Et chelle voix all' babène : « *Travaux routiers sur trois kilomètres : chaussée glissante !* » J'ai l'vé les yux... ch'étot vrai ! Marylou all' étot in train d'wassinger l'carr'lage ! A l'suite ed cha éch GPS i m'a invoïé dins ch'gardin : j'ai gardé la droite pou n'pas écraser chés glaïeuls... j'ai fait l'tour du rond-point de ch'piquet à linges... j'ai fait d'mi-tour dès que possible arrivé au bout de ch'courtil edvant l'porte ed l'armise... j'sus arparti dins l'aute sins... j'ai gardé la gauche pou n'pas marcher su l'queue de ch'cat qui s'cauffot au soleil... j'ai traversé tout m'baraque... j'sus parti dins l'rue... j'ai rintré dins l'mason de ch'voisin d'in face qu'i-étot in train d'dîner... j'ai fait l'tour du rond-point de s'tape ed cuisine... et quaind j'ai ardébuqué su l'seul éch GPS i m'a annoncé : « *Sortie imminente !* » Te pa'les d'eun' sortie imminente ! Éch voisin d'in face i m'a collé un caup d'chabot dins les reins : j'ai volé à plat vinte su ch'trottoir ! Alors j'ai artraversé l'rue... j'ai rintré à m'baraque et d'dépit'mint j'ai déchindu à l'café pour baller un canon et là... et là mes gins... dins l'café... éch GPS y'a dév'nu tout noir... pus d'son... pus d'imache... Alors j'ai poché su ch'bouton pour l'éteinde et j'ai été l'rinde à min voisin d'à coté in li diant que j'l'armercios granmint d'fos mais que mi j'préfèros incore ém' bonne vielle carte routière !

*D'siré au public, l'index brandi : — ...mais... mais... j'avos compris el sins du sigle GPS : Ch'est un Gadget Point Sûr !*

Glossaire : Edzeur : dessus Atiquer : accrocher, ici coller De l'crache : de la salive S'crojer : se croiser Ravisé : regardé Bec-bos : bouche-bée Ch'cabinet : les toilettes A t'mote : à ta convenance, ici dans le sens de 'bien sûr, évidemment' ! Gane : jaune Qui clin.ne : qui clignote Ch'courtil : le potager L'armise : la remise El seul : le seuil L'café : la cave Poché : pressé Granmint : beaucoup